



Kamis, 03 Juni 2021
Ogen: Job 1:5



BAPA SI ERTOTO



Tep-tep jaman erbage-bage perkembangan si jadi, enda kerina erkiteken kengasupen manusia ndatken erbage bage pemetej janah erbahan erbage karya guna kegeluhenna. I bas si e umumna, cara nggeluh manusia pe labo seri, cara ngalaken erbage-bage masalah pe pasti beda. Tapi si banci sipergermetken ras siukuri eme maka nilai-nilai keluarga tetap perlu ipertahanken i bas ndalani ras ngalaken erbage-bage perkembangan jaman e.

I bas ogenta teridah kuga Job mperdiateken kegeluhen anak-anakna, kai siibahanna janah kai ulih perbahanenna e. Pasti Job enggo mereken kata pedah, persinget man anak-anakna kuga arusna ia nggeluh i bas jabu, masyarakat ras kalak sierkinitenken. Tapi budaya ras kebiasaan erpesta dingin minem anggur la tersilahi anak-anakna enda. I bas situasi si bage me, peran ras tanggungjawabna selaku bapa ilakokenna alu notoken anak-anakna e. Ietehna maka la bias kata pedah saja siarus isehkenna man anak-anakna e tapi arus iarak-arak alu toto bagepe kenca erbage hal siilakoken anak-anakna arus mindo pengalemi dosa man Dibata. Bageme Job selaku bapa, orangtua nandangi ana-anakna.

Megati kal sibegi lagu 'di doa ibuku namaku disebut' langa lit sibegi di doa bapaku namaku disebut. Enda labo ngatakenca maka bapa la ertoto, bapa la notoken anak-anakna. Tek kita maka bapata pe notoken kita, perbulangenta pe notoken anak-anakna. Terdauhen man si kuh denga jabuta, mari, ajuklah perbulangenta tetap nggeluh i bas pertoton, janah notoken anak-anakta ntah pe kempu-kemputa. Rikutken perkembangan jaman sigenduari, la bias kata pengajaren saja sisehken man anak-anakta. Arus sipepaguhi kebujurena, la tergoda sekelewet si la payo alu pengarak-ngarak Dibata arah pertotonta. Pertoton kalak si tek ergegeh kal.